



REPUBLIKA E SHQIPËRISË
KOMISIONI QENDROR I ZGJEDHJEVE

KOMISIONI RREGULLATOR

Data: 23.2.2023

Nr: 8

VENDIM

PËR

**PROCEDURËN E HEDHJES SË SHORTIT PËR PËRCAKTIMIN E RENDITJES SË SUBJEKTEVE ZGJEDHORE
DHE KANDIDATËVE NË FLETËT E VOTIMIT, NË ZGJEDHJET PËR ORGANET E QEVERISJES VENDORE**

(ndryshuar me Vendimin nr. 13, datë 25.3.2023)

Në mbështetje të neneve 20, pika 1, shkronja "a", e 98, pika 5, të ligjit nr. 10019, datë 29.12.2008, "Kodi Zgjedhor i Republikës së Shqipërisë", të ndryshuar, me propozim të Komisionerit Shtetëror të Zgjedhjeve, Komisioni Rregullator,

VENDOSI:

Neni 1

Objekti

Ky vendim përcakton rregullat për hedhjen e shortit për renditjen e subjekteve zgjedhore dhe kandidatëve në fletët e votimit në zgjedhjet për organet e qeverisjes vendore, duke u bazuar në parimin e transparencës dhe barazisë.

Neni 2

**Renditja e subjekteve zgjedhore dhe e kandidatëve për kryetar të njësive të qeverisjes
vendore në fletët e votimit**

(neni 2, pika 1 dhe 2, ndryshuar me Vendimin nr. 13, datë 25.3.2023)

1. Renditja e subjekteve zgjedhore dhe e kandidatëve për kryetar të njësive të qeverisjes vendore në fletët e votimit bëhet nga numri më i vogël te numri më i madh, sipas përzgjedhjes rastësore (short) të numrave natyrorë.



Data: 23.2.2023

Nr. 8

"Për procedurën e hedhjes së shortit për përcaktimin e renditjes së subjekteve zgjedhore dhe kandidatëve në fletët e votimit, në zgjedhjet për organet e qeverisjes vendore"

2. Renditja e subjekteve zgjedhore në fletën e votimit për këshillin e bashkisë bëhet në katër faza, si vijon:

a) Në fazën e parë përfshihen në short subjektet zgjedhore të cilat kanë regjistruar lista shumemërore kandidatësh në të gjitha zonat zgjedhore.

b) Në fazën e dytë përfshihen në short subjektet zgjedhore, të cilat kanë regjistruar lista shumemërore kandidatësh nga 31 deri 60 zona zgjedhore.

c) Në fazën e tretë përfshihen në short subjektet zgjedhore të cilat kanë regjistruar lista shumemërore kandidatësh deri në 30 zona zgjedhore.

ç) Në fazën e katërt përfshihen në short kandidatët e propozuar nga zgjedhësit për këshillin e bashkisë, në rast se për një zonë zgjedhore regjistrohen dy ose më shumë kandidatë. Shorti do të hidhet ndërmjet tyre.

Në renditjen përfundimtare kandidatët e propozuar nga zgjedhësit për këshillin e bashkisë vendosen pas renditjes së partive politike dhe koalicioneve.

3. Në rast se në përfundim të hedhjes së shortit renditen njëri pas tjetrit subjekte zgjedhore, të cilat kanë emrin zyrtar, emblemën (siglën) apo shkronjat nistore të përafërta dhe që mund të shkaktojnë konfuzion apo lajthitje të votuesit, me kërkesë të subjekteve, shorti mund të përsëritet jo më shumë se dy herë të tjera, deri në renditjen që nuk shkakton konfuzion te votuesit.

4. Për përcaktimin e renditjes së kandidatëve për kryetar bashkie në fletën e votimit për kryetar të bashkisë, shorti bëhet për çdo zonë zgjedhore (bashki).

Neni 3

Veprimet paraprake përpara hedhjes së shortit

1. Komisioni Qendror i Zgjedhjeve (KQZ) njofton përfaqësuesit e subjekteve zgjedhore për datën, vendin dhe orën e caktuar për organizimin e shortit.

2. Data, vendi dhe ora e zhvillimit të shortit publikohen në faqen elektronike zyrtare të Komisionit Qendror të Zgjedhjeve.

3. Mosparaqitja e ndonjë prej përfaqësuesve të subjekteve zgjedhore nuk pezullon procedurat e shortit. Në këtë rast, caktohet një nëpunës i administratës së KQZ-së, të realizojë procedurën e parashikuar në këtë vendim për subjektin zgjedhor, përfaqësuesi i të cilit nuk është i pranishëm.

Neni 4

Procedura e hedhjes së shortit për renditjen e subjekteve dhe kandidatëve në fletën e

Votimit



(neni 4, pika 1, ndryshuar fjalia e parë, shkronja "a" dhe "b", shtuar pika "c", me Vendimin nr. 13, datë 25.3.2023)

1. Renditja për subjektet zgjedhore përcaktohet nëpërmjet dy proceseve, parashortit dhe shortit për secilën fazë. Në parashort përcaktohet radha ndërmjet subjekteve zgjedhore për të tërhequr numrin që do të ketë në fletën e votimit. Shorti përcakton numrin që do të mbajë subjekti zgjedhor në fletën e votimit. Parashorti dhe shorti zhvillohen sipas procedurës së mëposhtme:

a) Parashorti për secilën fazë zhvillohet si më poshtë:

i) KQZ-ja cakton një person nga administrata për procesin e parashortit,

ii) Përgatiten në shirita letre emrat e subjekteve zgjedhore pjesëmarrëse në short dhe sigurohen numër goglash i barabartë me numrin e shiritave. Shiritat e letrës janë të barabartë dhe verifikohen për saktësi nëpërmjet ekspozimit nga nëpunësi i administratës, nga të gjithë të pranishmit. Goglat duhet të jenë të së njëjtës ngjyrë, pa shenja apo shënime dhe të së njëjtës peshë e madhësi.

iii) Në tryezën ku hidhet shorti vendosen shiritat me numrat rendorë, goglat dhe enë transparente. Në secilën prej goglave futet nga një shirit letre e më pas, goglat futen në një enë transparente. Goglat përzihen me qëllim sigurimin e barazisë në përzgjedhje

iv) Nëpunësi i administratës së KQZ-së, pasi i përzien goglat, tërheq një prej tyre, e hap, lexon emrin e subjektit zgjedhor që është shënuar në shiritin brenda saj dhe ia dorëzon Sekretarit të Përgjithshëm të KQZ-së,

v) Subjekti zgjedhor që është shënuar në shiritin e letrës brenda goglës së parë, dotë jetë i pari që do të tërheqë goglën në shortin që do të zhvillohet sipas procedurës së përcaktuar në shkronjën "b", të kësaj pike, e kështu do të vazhdohet deri në tërheqjen e të gjitha goglave brenda në enë.

b) Shorti për fazën e parë zhvillohet si më poshtë:

i) Përgatiten shirita letre ku në secilin prej tyre shënohet një numër duke filluar nga numri 1 (një) deri tek numri i barabartë me numrin e subjekteve zgjedhore pjesëmarrëse në short dhe sigurohen numër goglash i barabartë me numrin e shiritave. Shiritat e letrës dhe goglat plotësojnë kriteret e nënndarjeve "i" dhe "ii", të shkronjës "a", të kësaj pike. Shiritat verifikohen për saktësi nëpërmjet ekspozimit nga nëpunësi i administratës, nga të gjithë të pranishmit.

ii) Në tryezën ku hidhet shorti vendosen shiritat me numrat rendorë goglat dhe enë transparente. Në secilën prej goglave futet nga një shirit letre e më pas, goglat futen në një enë transparente. Goglat përzihen me qëllim sigurimin e barazisë në përzgjedhje.

iii) Përfaqësuesit e subjekteve zgjedhore tërheqin nga ena një gogël sipas radhës së përcaktuar në parashort. Përfaqësuesi i subjektit zgjedhor hap goglën dhe lexon numrin që është shënuar në të. Ky numër do të jetë numri rendor që subjekti zgjedhor do të ketë në fletën e votimit për këshillin e bashkisë.

c) E njëjta procedurë e përcaktuar në shkronjën “b” ndiqet për çdo fazë. Numrat e përfshirë në short janë në rend rritës dhe të barabartë me numrin e subjekteve që marrin pjesë në secilën fazë. Numrat që shënohen në shiritat e letrës të përfshirë në fazën/fazat pararendëse nuk përfshihen në fazën vijues.

2. Pas përfundimit të shortit për renditjen e subjekteve zgjedhore në fletën e votimit për këshillin e bashkisë, organizohet shorti për renditjen e kandidatëve në fletën e votimit për kryetar bashkie.

3. Renditja e kandidatëve për kryetar të njësisë së qeverisjes vendore përcaktohet nëpërmjet shortit, sipas procedurës së mëposhtme:

a) Përgatiten shirita letre të barabartë me numrin e kandidatëve të regjistruar për kryetarë të njësisë së qeverisjes vendore. Në secilin prej shiritave shënohen emrat e kandidatëve për kryetarë.

b) Sigurohen numër goglash i barabartë me numrin e shiritave. Goglat duhet të jenë të së njëjtës ngjyrë, pa shenja apo shënime dhe të së njëjtës peshë e madhësi.

c) Në secilën prej goglave futet nga një shirit letre dhe goglat futen në një enë transparente. Shiritat e letrës janë të barabartë dhe verifikohen për saktësi nëpërmjet ekspozimit nga nëpunësi i administratës, nga të gjithë të pranishmit.

ç) Goglat përzihen me qëllim sigurimin e barazisë në përzgjedhje.

d) Nëpunësi i administratës tërheq nga ena një gogël, e hap, nxjerr shiritin e letrës dhe lexon emrin e kandidatit të shënuar në të, duke e ekspozuar për të pranishmit. Emri i kandidatit që shënohet në shiritin e parë që tërhiqet, do të mbajë numrin 1 (një) në fletën e votimit. Kështu vijohet me radhë rritëse deri në tërheqjen e të gjitha goglave brenda në enë.

4. Administrata e KQZ-së mban procesverbalin e rezultateve të shortit.

Neni 5

Rezultati i Shortit

Komisioneri Shtetëror i Zgjedhjeve miraton me vendim rezultatin e shortit për renditjen e subjekteve zgjedhore dhe kandidatëve për kryetar bashkie në fletët e votimit për çdo zonë zgjedhore (bashki).

Neni 6

Hyrja në fuqi dhe ankimi

1. Ngarkohet administrata e Komisionit Qendror të Zgjedhjeve për zbatimin e këtij vendimi.

2. Ky vendim hyn në fuqi menjëherë dhe publikohet në faqen elektronike zyrtare të Komisionit Qendror të Zgjedhjeve.

3. Kundër këtij vendimi mund të bëhet ankim në Kolegjin Zgjedhor Gjyqësor pranë Gjykatës Administrative të Apelit Tiranë, brenda 5 (pesë) ditëve nga shpallja e tij.

Iirjana NANO-	Kryetar
Arens ÇELA-	Anëtar
Dritan ÇAKA-	Anëtar
Helga VUKAJ-	Anëtar
Muharrem ÇAKAJ-	Anëtar